



Curdin Linsel, Giusep Giuanin Decurtins e Clau Scherrer (da schn.) sülla Piazza Somvih, üna da las plazzas da Zuoz ingio chi gnarà chantà in lügl 2022. Foto: Flurin Andry/fmr

Zuoz

## Il festival da la chanzun rumantscha a Zuoz ed il plan B

**Kultur** 18.02.22 Graubünden Zuoz

Malgrà cha'ls cors rumantschs ston viver actualmaing cun restricziuns per exercitar, as prepara l'Engiadina pel seguond Festival da la chanzun rumantscha. Quel ha lö als prüms dis da lügl a Zuoz.

«L'ultim mez on es reservà per l'organisaziun in detagl.» Quai ha dit il president dal comitè d'organisaziun dal Festival da la chanzun rumantscha a Zuoz, Curdin Linsel, a la FMR. «Il program definitiv sta e nus vain tuot ils partenaris e sponsurs.» Eir las singulas occurrenzas sajan preparadas tantinvant. «Eu sun fich superbi da pudair dir cha'l festival es tant sco finanzià. Il preventiv s'amunta a bundant 100'000 francs.»

### Concerts da la saira fan pissers

La finamira dal comitè d'organisaziun dal 2. Festival da la chanzun rumantscha d'eira da cumanzar bod avuonda culs preparativs eir per avair temp da tscherchar eventualas soluziuns o müdadas causa la pandemia. Sco quai cha Curdin Linsel ha dit, fetscha el amo adüna ün pa pissers pels concerts dals cors dal venderdi e la sonda saira. «Bler cors nun han fat exercizis regulars quist invern e bleras chantaduras e chantadurs nu van a chantar. Perquai cha insaquants cors sun intscherts nu s'han els amo annunziats pels concerts.» Forsa cha la situaziun da corona as quieta e lura sajan ils concerts salvats. Uschigliö stopchan els organisar be üna saira da concert ed implir la piazza dal concert da la seguonda saira cun ün program alternativ.

«In Engiadina as stopcha quasi adüna avair eir ün plan B per occurrenzas plü grondas», disch Curdin Linsel, «pel festival a Zuoz vain nus il plan B i'l chaschuot.»

In cas da plövgia stuvain nus far tuot dadaint ed in cas d'ün'uonda dal coronavirus stuvain nus resguardar las prescripziuns da la Confederaziun e dal Chantun. «Nus dal comité d'organisaziun ed ils respunsabels da l'Uniun La Chanzun Rumantscha sperain intant fich ferm cun ora e temperaturas da stà e cifras d'infecziun bassas chi dan bleras libertats da chantar da cour e giodair il festival.»

53 cumposiziuns da chanzuns dal tuottafat novas sun gnüdas inoltradas pel Festival da la chanzun rumantscha a Zuoz. 13 chanzuns sun per cors d'uffants, 23 chanzuns per cor masdà, 13 per cor viril e trais per cor da duonnas. Per las chanzuns han ils cumponists tschernü texts da differentas auturas ed auturs rumantschs. Da las trais categorias ha üna giuria da trais dirigents e musicists na invouts tschernü e rangà quatter chanzuns. E quellas chanzuns ston gnir preparadas dals cors per la concorrenza da cumposiziun. «Eu cugnuosch be las chanzuns dals cors masdats chi pertoccan meis cor ad hoc», ha dit Curdin Linsel, «las chanzuns da concorrenza sun cumponüdas in differentes stils, davent dal stil avantgardistic infin al stil da la chanzun populara.» Pro las chanzuns per cor masdà haja el l'impreschiun cha quellas possan gnir chantadas bain eir da mincha cor da cumün. Quai saja eir stat l'intent d'avair nouva litteratura pels cors.

### **Cors ad hoc exerciteschan**

Tenor il schef d'organisaziun, Curdin Linsel, funcziunan las prouvas da las chanzuns plü o main bain pro'ls cors d'uffants e pro'ls cors masdats ad hoc. «Pro'ls cors virils nun han ils exercizis amo cumanzà. Eu n'ha intant surgni clers signals chi vegna a funcziunar eir culla concorrenza dals cors virils.» Per las chanzuns da cor da duonnas nu saja pro quist festival amo ingüna concorrenza. «Nus eschan amo in tschercha da chantaduras e chantadurs chi han experienza da chantar in ün cor e chi pon imprendar las notas da las quatter chanzuns a chasa.»

### **Appel a chantaduras e chantadurs interessats**

Ils dirigents dals cors ad hoc virils e masdats dal seguond Festival da la chanzun rumantscha tscherchan amo chantaduras e chantadurs. Quels stessan avair experienza ed esser prunts da collavurar o cun ils cors masdats (dirigent Curdin Linsel) o culs cors virils (dirigent Retus Giger).

Interessadas ed interessats pon s'annunzchar pro [retus.giger@bluewin.ch](mailto:retus.giger@bluewin.ch); 079 508 99 55 opür [curdin.linsel@bluewin.ch](mailto:curdin.linsel@bluewin.ch); 079 833 82 15

Autur: Martin Gabriel/fmr, fotografia: Flurin Andry/fmr